

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U TUZLI
Broj: 32 0 St 401746 21 St
Tuzla, 19.11.2021.godine

Općinski sud u Tuzli, sudija Faruk Arnaut, u stečajnom postupku nad imovinom dužnika „KALE- POLOVNA ROBA“ d.o.o. Lukavac, ul Milerova br.2, Lukavac, u stečaju „KALE- POLOVNA ROBA“ d.o.o. Lukavac, Podružnica Lukavac br.1., ul. Lukavačkih brigada bb Lukavac, odlučujući o prijedlogu za otvaranje stečajnog postupka dana 19.11.2021. godine, donio je sljedeće

R J E Š E N J E

I-OTVARA SE stečajni postupak nad imovinom dužnika „KALE- POLOVNA ROBA“ d.o.o. Lukavac, ul Milerova br.2, Lukavac, u stečaju „KALE- POLOVNA ROBA“ d.o.o. Lukavac, Podružnica Lukavac br.1, matični broj subjekta 32-01-0219-17, JIB: 4210304570007, broj glavnog računa 1995050010112457 otvoren je kod Sparkasse Bank d.d. BiH .

II-Stečajni postupak se otvara sa danom 19.11.2021. godine u 15,00 sati, kada se rješenje o otvaranju stečajnog postupka ističe na oglasnoj tabli suda. Oglas o otvaranju stečajnog postupka objavit će se u „Službenim novinama F BiH“.

III-Za stečajnog upravnika imenuje se **Maja Musemić dipl.ecc. iz Tuzle, ul. Maršala Tita br.60, Tuzla.**

IV-Nalaže se stečajnom dužniku i trećim licima da stečajnom upravniku predaju u posjed imovinu i dokumentaciju stečajnog dužnika koja je u njihovom posjedu.

V-Pozivaju se povjerioci da u roku od 30 (trideset) dana, od dana objavljivanja oglasa o otvaranju stečajnog postupka u „Službenim novinama F BiH“ prijave svoja potraživanja stečajnom sudu dostavom prijave i priloga u dva primjerka u skladu sa odredbama Zakona o stečaju prijavi potraživanja (član 105. Zakona), te prilože dokaz o uplaćenju sudskoj taksi na prijavu potraživanja u iznosu od 1% od vrijednosti potraživanja, s tim da taksa ne može biti manja od 50,00 KM, niti veća od 10.000,00 KM, na žiro račun broj 1321000256000080, vrsta prihoda 722221, primalac Budžet Tuzlanskog kantona.

VI-Pozivaju se povjerioci da u roku od 30 (trideset) dana, od dana objavljivanja oglasa o otvaranju stečajnog postupka u „Službenom novinama F BiH“ stečajnog upravnika obavijeste koja prava osiguranja potražuju na predmetima imovine stečajnog dužnika. Potrebno je navesti predmet na kome se potražuje pravo osiguranja, vrstu i razlog nastanka prava osiguranja kao i osigurano potraživanje.

VII-Pozivaju se lica koja imaju obaveze prema stečajnom dužniku da ih bez odlaganja izvrše.

VIII-Otvaranje stečajnog postupka ima se upisati u sudski registar Općinskog suda u Tuzli, zemljišne knjige Općinskog suda u Lukavcu, te kod Službe za geodetske i imovinsko-pravne poslove Općine Lukavac.

IX-Skupština povjerilaca (ročište za ispitivanje) na kojem će se ispitati prijavljena potraživanja zakazuje se za dan **ČETVRTAK 06.01.2022. godine u 11,00 sati, u zgradi Općinskog suda u Tuzli, ulica ZAVNOBIH-a bb, sudnica S/4 prizemlje.**

X-Skupština povjerilaca (izvještajno ročište) na kome će se na osnovu izvještaja stečajnog upravnika odlučiti o daljem toku stečajnog postupka održat će se u **ČETVRTAK 06.01.2022. godine, na istom mjestu nakon ročišta za ispitivanje prijava potraživanja.**

XI-Rješenje o otvaranju stečajnog postupka u cijelosti objavit će se na oglasnoj tabli suda, web-stranici suda – elektronskoj tabli suda, na internet stranici FIA-e, a u Službenim novinama F BiH objavit će se samo izreka rješenja.

O b r a z l o ž e n j e

Dana 27.05.2021 godine, predlagač „KALE- POLOVNA ROBA“ d.o.o. Lukavac, ul Milerova br.2, Lukavac, kao dužnik podnio je prijedlog za otvaranje stečajnog postupka nad imovinom dužnika iz razloga platežne nesposobnosti, temeljem odredbe člana 4 i čl. 6. Zakona o stečaju („Sl.novine F BiH“, br.53/2021).

Nakon razmatranja prijedloga sud je rješenjem od 26.08.2021. godine, pokrenuo prethodni postupak radi utvrđivanja uslova za otvaranje stečajnog postupka i imenovao privremenog stečajnog upravnika temeljem odredbe čl. 60., 61. i 63. Zakona o stečaju.

Privremeni stečajni upravnik u spis suda dostavio je izvještaj o provedenom prethodnom postupku sa nalazom i mišljenjem na okolnosti postojanja razloga za otvaranje stečajnog postupka. Temeljem odredbe čl. 102 stav 1. Zakona o stečaju zakazano je ročište radi ispitivanja uslova za otvaranje stečajnog postupka i rasprave o izvještaju privremenog stečajnog upravnika na koje je pristupio privremeni stečajni upravnik i zakonski zastupnik predlagača.

Iz izvještaja privremenog stečajnog upravnika proizilazi da je društvo dužnika osnovano u novembru 2017. godine pod registarskim brojem upisa 032-0-Reg-21-000162, a da je dana 12.02.2021. godine rješenjem ovog suda utvrđen prestanak rada društva. U registru privrednih društava kao lice ovlašteno za zastupanje upisan je Kasim Jusić. Iz izvještaja i usmenog pojašnjenja na ročištu održanom dana 16.11.2021. godine proizilazi da se društvo isključivo bavilo prodajom polovne robe koju je uvozilo iz zemalja evropske unije, te da je poslovnu djelatnost obavljalo do 27.05.2021. godine, kada je zbog platežne nesposobnosti društvo donijelo odluku o prestanku rada. Iz izvještaja proizilazi da je

blokadom transakcijskog računa od strane UIO RC Tuzla dana 10.03.2021. godine u iznosu od 629.168,00 KM, nastupila platežna nesposobnost privrednog subjekta. U pogledu uposlenih lica prema završnom računu od 31.12.2020. godine koji je ovjereno u FIA u društvu je bilo zaposleno jedno lice, direktor Kasim Jusić, koji je objavljen u Poreznoj upravi sa danom 31.08.2021. godine. Iz pregleda finansijskog stanja društva za posljednje tri godine, privremeni stečajni upravnik je utvrdio da je društvo poslovalo sa gubitkom u 2019. i 2020. godini, sa prikazanim gubitkom iz poslovanja u iznosu od 57.000,00 KM za 2020. godinu. U pogledu imovine društva, prema knjigovodstvenoj evidenciji privremeni stečajni upravnik je utvrdio da je društvo na dan 26.08.2021. godine imalo evidentirano stalna sredstva u iznosu od 2.735,00 KM koja se sastoje od kancelarijske opreme. U pogledu nepokretne imovine, društvo ima upisanu nekretninu- zemljište, označeno kao k.č. 2348/10, k.č. 2348/2, k.č. 2348/3, k.č. 2348/8, k.č. 2348/1 i k.č. 2348/9, ukupne površine od 4525 m² sa upisanim pravom vlasništva u korist društva dužnika. Nadalje, privremeni stečajni upravnik je na osnovu sagledavanja stanja imovine na licu mjesta utvrdio da je na zemljištu izgrađena ne dovršena poslovna hala koja nije legalizirana i nema građevinsku dozvolu, niti se vodi u bilo kojem obliku u knjigovodstvenim evidencijama stečajnog dužnika. Na navedenoj nekretnini dana 30.09.2021. godine upisana je hipoteka u korist UIO RC Tuzla na osnovu rješenja registracije hipoteke broj 02/6-2-IV-16-16-113-2008-9/21-5 od 07.07.2021. godine, a koja je upisana radi osiguranja naplate duga po osnovu neplaćenih indirektnih poreza, ostalih prihoda i taksi u iznosu od 655.948,10 KM koji će se uvećati za iznos kamate po stopi od 0,04% dnevno do dana izmirenja duga. U pogledu evidentiranih tekućih sredstava na dan 26.08.2021. godine, privremeni stečajni upravnik je utvrdio da u poslovnoj dokumentaciji društva je evidentirana roba (zalihe), knjigovodstvene vrijednosti 46.111,00 KM, koja je na osnovu neposrednog pregleda od strane privremenog stečajnog upravnika upitna u pogledu njene stvarne vrijednosti, zbog stanja u kojem se nalazi, jer je ista bila skladištena u prostoriji koja je izložena vlazi. U pogledu potraživanja od kupaca u zemlji na dan 26.08.2021. godine, evidentirana su potraživanja u iznosu od 5.376,00 KM, s tim da su potraživanja u iznosu od 2.856,19 KM ne zastarjela, a u preostalom iznosu se radi o zastarjelim potraživanjima koja nisu utužena. Privremeni stečajni upravnik je utvrdio da su evidentirana potraživanja od kupaca u inostranstvu u iznosu od 4.807,00 KM, te da u iznosu od 3.299,50 KM nisu zastarjela. Nadalje, stečajni upravnik u poslovnim knjigama ima evidentirana potraživanja za PDV na dan 26.08.2021. godine u iznosu od 56.853,00 KM, ali ima evidentiran dug prema UIO RC Tuzla u iznosu od 650.542,44 KM. Rasploživa sredstva na transakcijskom računu na dan 07.06.2021. godine su iznosila 445,52 KM.

Obzirom na utvrđeno stanje u društvu dužnika, procjena je privremenog stečajnog upravnika je da društvo nije sposobno da nastavi poslovanje, te da nije moguće provesti reorganizaciju privrednog subjekta, za koju je još ranije utvrđen prestanak rada društva. Zaključak privremenog stečajnog upravnika je da postoji stečajni razlog za otvaranje stečajnog postupak predviđen članom 6. stav 2. i članom 102. Zakona o stečaju, ali da nisu ispunjeni uslovi za otvaranje stečaja, jer dužnik ne posjeduje raspoloživa sredstva kojim bi se pokrili početni troškovi stečajnog postupka. Privremeni stečajni upravnik je u pisanom izvještaju i usmeno na ročištu održanom dana 16.11.2021. godine, detaljno opisao nužne troškove za vođenje stečajnog postupka (procjena vještaka i ovlaštenih procjenitelja, troškovi advokata i sudski troškovi za eventualno vođenje spora u pogledu upisane hipoteke

od strane UIO RC Tuzla, koja je izvršena nakon podnošenja prijedloga za otvaranje stečajnog postupka, koje pravo u tom slučaju prestaje po otvaranju stečajnog postupka u smislu odredbe člana 116. Zakona o stečaju, zatim troškova oglašavanja, bankarskih troškova i dr.), te je utvrđeno da se izvrši uplata iznosa od 11.013,00 KM, radi finansiranja troškova stečajnog postupka.

U smislu odredbe člana 102. stav 7. Zakona o stečaju, sud je rješenjem na zapisniku sa održanog ročišta od 16.11.2021. godine, naložio predlagачu da u roku od 30 dana od dana održavanja ročišta izvrši uplatu iznosa od 11.013,00 KM na depozitni račun suda, kako bi se ispunili uvjeti za otvaranje stečaja i provođenje stečajnih radnji koje su propisane zakonom.

Dana 18.11.2021. godine, sud je u spis zaprimio uplatnicu dostavljenu od strane predlagачa u iznosu od 11.013,00 KM, na ime finansiranja troškova stečajnog postupka.

Na osnovu izvedenih dokaza tokom postupka utvrđeno je da je prijedlog za pokretanje stečajnog postupka dopušten, zbog nesolventnosti i nelikvidnosti dužnika postoji stečajni razlog, a iz preostalih sredstava uplaćenih na ime pokretanja predhodnog postupka za utvrđivanje uslova za otvaranje stečajnog postupka u iznosu od 4.000,00 KM i uplaćenog iznosa od 11.013,00 KM na ime otvaranja stečajnog postupka, finansirat će se troškovi stečajnog postupka.

Sud je temeljem odredbe čl. 102. stav 4. a u vezi sa čl. 6. Zakona o stečaju odlučio kao u izreci rješenja i odlučio o otvaranju stečajnog postupka.

Odluku o imenovanju stečajnog upravnika, sud je donio temeljem odredbe člana 104. stav 2. tačka b. . Zakona o stečaju, a nakon što je utvrdio da isti ispunjava uslove utvrđene odredbom člana 71. Zakona o stečaju.

Sud je, odluku o određivanju ročišta za ispitivanje prijavljenih potraživanja i izvještajnog ročišta, donio temeljem člana 106 Zakona o stečaju.

Odluku o objavljivanju otvaranja stečajnog postupka, sud je donio temeljem člana 105. stav 1. Zakona o stečaju.

Temeljem odredbe člana 105. Zakona o stečaju, sud je uputio odgovarajuće pozive povjeriocima i dužnicima stečajnog dužnika.

Upis otvaranja stečajnog postupka u javne registre određen je temeljem odredbe člana 108. stav 1. tačka a. Zakona o stečaju.

STEČAJNI SUDIJA,
Faruk Arnaut

POUKA O PRAVNOM LIJEKU:

Protiv ovog rješenja žalbu može uložiti stečajni dužnik.

Žalba se podnosi Kantonalnom sudu u Tuzli, putem ovog suda

u tri primjerka u roku od 8 dana po proteku 5 radni dana od dana objave rješenja u Sl. novinama F BiH.

Žalba iz prethodnog stava ne odlaže izvršenje rješenja.